

18/06/2000

(Sedangkan lidah lagi tergigit)

Kem motivasi pelumba haram

LUMBA haram suatu permasalahan yang membimbangkan. Pada pendapat saya, cara untuk mengatasi masalah ini memerlukan pembabitian semua pihak iaitu institusi keluarga, masyarakat dan juga pihak berkuasa. Ibu bapa misalnya perlu bijak menangani permasalahan anak mereka dan seboleh-bolehnya jadikan mereka sebagai kawan. Ini bermakna ibu bapa tidak harus terlalu menekan nak dan jika mereka bersalah, cara terbaik adalah dengan dibawa berbincang.

Masyarakat turut memainkan peranan penting dan jika perlumbaan haram itu berlaku, mereka harus mengambil sikap menjaga tepi kain orang dengan melaporkannya kepada pihak berkuasa.

Undang-undang ketat tidak diperlukan, tetapi motivasi terhadap remaja amat penting. Remaja yang didapati bersalah janganlah dipenjarakan, sebaliknya saya mencadangkan supaya mereka ini ditempatkan di kem-kem motivasi bagi menyedarkan permasalahan selain berupaya memperbaiki sikap dan minda mereka.

Di kem motivasi itu juga mereka boleh didedahkan dengan aktiviti berbentuk keagamaan atau pun cara menangani masalah tekanan. Mereka boleh dipertontonkan dengan video kemalangan jalan raya atau melawat hospital yang menempatkan mangsa kemalangan.

Lebih elok jika mangsa lumba haram itu atau ibu bapa mangsa berupaya memberi nasihat terus kepada remaja bermasalah itu. Selain itu, setiap negeri juga perlu mempunyai litar dan tidak perlulah menyamai litar bertaraf antarabangsa seperti Formula 1. Tetapi, memadailah dengan mengosongkan jalan raya bagi diadakan kegiatan perlumbaan secara sah.

Pihak kerajaan negeri juga boleh bekerjasama dengan persatuan pemotoran. Bagi saya cara seperti ini berkesan bagi membendung masalah lumba haram dan melahirkan lebih ramai pelumba profesional sesuai dengan saranan Perdana Menteri, Datuk Seri Dr Mahathir Mohamad agar menjadikan sukan bermotor itu popular di Malaysia.

Kegiatan lumba halal ini boleh diadakan setiap malam minggu dan pelumbanya mestilah mempunyai lesen khas yang ditetapkan pihak berkuasa. Namun, paling penting remaja itu sendiri perlu sedar tanggungjawab mereka dan seharusnya sudah matang untuk menilai mana buruk dan yang baik.

MUHAMAD RONI PASLA

TAMAN MELAKA BARU, MELAKA